



LE COIN DU PATOIS

ZEF

&
MÉLANIE



JE N'AI VU UN !

NOTE DE LA RÉDACTION. — Après trois mois d'absence pour raison de famille, Zef et Mélanie viennent de rentrer à Douai. Voici le premier papier que nous communique Zef...

ZEF : Bonjour tertous !... J' sus bin contint d'être r'venu à Douai, mais j'vas icbi vous raconter eune bistoire que j' voudros pas qu' Mélanie elle sache. Elle s' moqu'rot d' mi si j'y avouot tout cha ; alors, j' vas vous l' dire pou' vous tous seu et j' vous d'minde d' pas aller y raconter... Cb'est promis, bein ?... D'abord, in sait bin qu'à Douai y a personne qui voudrot moncharder d'su l' dos d' sin voisin, alors j'y vas sin crainte.

Eh bin ! Figurez-vous que j' n'ai vu un ! Ouai, ouai ! Je n'ai vu un ! et pis un biau et j'avos pas du tout la berlu, j' vous l' jure !... Si vous aroles vu commint qu' ch'a s'est produit... comme mi, vous in restotes cor baba !...

J'étois dins min jardin in train d' biner... Y allot bintôt faire noir et j' m'apprétois à rintrer mes outils, quand tout-à-coup y a eu eune lueur forte et d'eune drôle de couleur !... eune couleur qu'elle existe pas su tierre. Cb'étoit un mélange d' blanc avec du rouche et du doré qu' cha donnot un vert étrange comme j' peux pas expliquer.

Bref, me v'là tout estourbi et j' pouvos pu faire un mouv'mint... impossib de r'muer même min tiot doxt ; mais j' continuos à vir !... Et alors j'ai vu !... J'ai vu un espèce d' cigare comme forme. Mais

cb'étoit gramint pu grind qu'un cigare. Y a eune porte qu'elle s'est ouverte, pis y est déchindu eune espèce d' biète qu'elle avot à peu près la forme d'un homme... Mais un drôle d'homme ! S' tiète elle étoit carrée, y avot qu'un wil au mitin, sin nez y étoit long comme eune carotte moyenne, et s' bouque elle avot la forme d'un entonnoir !... J'aros voulu crier mais j' pouvos pas, j'étois paralysé... V'là ti pas qu'y s'approche d' mi... et j' pouvos pas m' sauver non pus, j'étois cloué su' place...

Donc, v'là min homme qui s'avince sur mi, qui m' prind dins ses bras... Sin long nez, par je n' sais quel miracle, y s' retrousse in l'air et y applique s' bouque in forme d'intonnoir su' mes joues... Cha faisot comme eune vintouse, à croire qu'y allot arracher m' piau et dins s' gorge cha groulot ! Grot !... grot !... grot !... cha faisot, un peu dins l' genre d'un cat qui ronronne. A s'n'allure j'ai compris qu'y étoit contint et qui m'inbrassot. Mais mi, j' vous l' jure, j'étois pas rassuré du tout... Dins m'n'idée, ch'étoit un Marsien, et in sait jamais avec ches gins-là !...

Et pis, tout-à-coup, y r'parti vers sin cigare, y a rintré d'dins, y m'a fait un tiot signe avec sin bras, pis tout y a disparu d'un seul coup et j'ai r'pris aussitôt l'usage d' mes membres...

Et ch'est vrai vous savez, tout cha !... J' vous assure que j' l'ai vu et bin vu !... Seul'mint, y faut que j' sois franc et que j' vous avoue eune chose... ch'étoit dins un rêve !...